

重修恩平縣志序



余調長恩平之三月邑紳梁君雲橋吳君逸凡鄭君雲軒吳君玉池岑君梅閣馮君璞仁梁君伯芙鄭君芷腴馮君冰懷唐君雪生伍君貫之陳君冕廷梁君用康吳君友文等以重修恩平縣志告成請序於余夫纂縣志非易事也諸君子能瘁其數年之心血靡寒靡暑博訪周諮使紛繁年遠之縣事分門別類提要鉤元斐然成章予爲政者以圖治之要負乎尙矣非諸君子之力曷克臻此余已嘉其能且勞且依章余爲主纂者今幸觀厥成此靡特余之願抑亦邑人之願也夫人類之進化至繁且曠也其間世代之推移事態之變遷如書史之所載百家之所述浩如淵海繁若列星前哲以歷史爲進化之重心其言蓋有由也故謀國者必探天下之曠然後可盡天下之變是以乾象歲功歷法庶徵坤輿職方山川邊裔皇極宮闈官常家範交誼氏族人事閭媛藝術神異禽獸草木經籍學行文學字學選舉銓衡食貨禮儀樂律戎政祥刑考工等悉著爲文獻垂爲世則具古今興衰得失之原謀補敝起廢之道非徒博見洽聞而已也然則縣志其亦意在斯乎夫縣政乃國政之始也其吏治政教風俗人事經濟文物典章與國政莫不息息相關倘能達其體要觸類引申而廓之家國天下則無往而不利矣所謂視都知野視野知國又豈止述往事而思來者也耶

中華民國二十三年七月八日恩平縣縣長合浦余丕承繩武
序縣政府

恩平縣志 卷首

序文

二

聖堂光華書局承印

重修恩平縣志

序

圖經政書也周禮司書大司徒量入司險各有專官事綦重矣秦漢以來第詳地理郡縣晉王隱晉書地道記太康三年地記闕闕十三州志唐魏王泰括地志是其例也唐李吉甫元和郡縣志宋王存元豐九域志本不收藝文人物宋范成大吳郡志則以藝文附各條下不別立一門明康海武功縣志因之自宋樂史太平寰宇記多載藝文人物而體例始大變元明一統志及通志府縣志因之恩平爲漢合浦郡高涼縣地三國吳始分置爲海安縣齊隋唐宋代有更易明成化十四年析陽江新興

新會三縣地復置恩平縣清代因之恩平縣志祖自明季自明迄清遞有纂輯垂之典冊於今又逾百年矣比者上官徵集縣志令各縣定期呈繳遠紹旁搜事不可緩邑人士吳逸凡廣文以總纂之役相屬余不獲以藹陋辭乃受舊志而讀之此篇所著首列圖說起例發凡多仍其舊而於圖經不厭求詳番禺陳蘭甫先生漢書地理志水道圖說序云讀史不可不明地理而攷地理不可無圖書志者史書之根源亦政書之脈絡也重纂旣成爰志顛末於簡端癸酉夏五南海桂拈序

舊志序

宋志原序

厥初狃糝結繩可治大庭粟陸之世不知其幾千百歲而無紀也志之興也其於中古耶四方之志外史掌之所從來亦遠矣志在春秋素王素臣言之文行之遠其斯以爲志鵠乎雖甚僻小苟或邑之必或志之一閩之市三家之村肉賤酒薄猶有司焉惡其害已而皆去其籍則大亂之道也恩平新設之邑半設之員然自成化間立縣以來經如許歲年而志未立余叨任未幾上臺檄取縣志無以應余甚病之詢於鄉先生梁叔建氏乃以其所輯志稿見示余獲之如獲拱璧屬羊城盧原甫至盧博

雅士也臨邛見客非無作賦之才禹穴曾探又饒良史之識且萊蕪一甑嘗塵平原十日不具因取志稿屬之草創逾月告竣適余有考察錄囚文武兩闈之役遷延久之未竟修飾至仲冬始克就緒付之梓其義例倣郡志間有併有省則相其宜存其質也爲目十有一曰事紀曰秩官曰選舉曰建置曰賦役曰兵防曰地理曰祠祀曰列傳曰雜記曰藝文偶合以天數五乘地數六之數嗟乎以恩僻小之鄉兼余淺昧之識而欲掇備乎文獻誠不自量第幸兩君子推之挽之辟諸蒐獵梁則方而驅諸原盧則割而登之釜余持劑調濟啜之使適於口而已諺曰跣則鹿烏則肉吾能無內愧乎哉昔崇禎九年丙子仲冬長至之

吉知恩平縣事宋應昇撰

宋志盧序

歲己亥當神宗顯皇帝之萬曆二十有六年旬宣東粵左轄山陰王公泮大修省志聘鄉先紳三人總裁其事郡邑名諸生十人分修十郡先世父廷龍領肇慶一府之屬原甫弱齡執筆從事明年庚子世父舉孝廉以計偕行時志草已什九屬原畢力以復當事者至今宛然在胸臆間也原生也賤少多奇病自先君子詣闕上書還不幸而早世依依慈母拮据勞瘁不能苦事鉛槧甫成就而又會先世父捐館舍家難叢生賣白雲之田駕青雀之舫浮三湘窮七澤週吳越遍五湖一十六年歸而泊珠

江之上鷓鴣一枝且未遂安亡何游嶺以西入瀧江旋駐端州進而游恩州卽今恩平縣訪豫章宋元孔令公豫章原舊遊令公才名重海內聲氣之投固非一日風流愛客不減臨卣下榻雲松觴咏間以其治邑之志事相屬噫原何人斯梁園授簡先媿相如石渠載筆敢效馬遷而敢當斯任令公愛逾誠而委愈篤誼不容辭且謂恩平從未有志之者因憶原三十年前胸臆間事欲歸而摻前稿恩平一屬豈不具在逼於家難流離連牀充棟之書先人手澤竟無從覓徒增傷嘆幸而令公先得邑人梁叔建先生草本一帙恐其未備令公復蒐求郡乘博採羣情原得以散秩橫襟摻其遺以補其漏存其要以芟其蕪時兒光

大隨行侍事命其攷畫輿圖指陳阨塞使入其地者見志之所
臚列爲不誣也雖然邑有新故治有緩急物有簡鉅爲之志者
務縷析而次序之庶幾無紊焉觀夫自有封域則有盛衰世運
迭更沿革匪一必先之以縣紀縣紀既詳民安物阜不賴官師
其何以統故次之以秩官蔚然霧變代豈乏奇徵辟道衰科貢
斯顯次之以選舉官有署師有序倉場解宇表厥常儀城郭橋
梁悉資營度次之以建置君子竭其謀小人輸其力食土之毛
其誰不供車轍馬塵通衢孔瘁次之以賦役龍蛇之生多在山
澤戈矛甲冑以備不虞次之以兵防天道旋於上地輔轉於下
山川險易彼此殊形隄岸陂塘物利攸藉次之以地理祭明馨

也不秩則黷文教聿昭敬修秩祀次之以祠祀畏壘桐鄉無忘
俎豆潛貞顯烈懦俗以興星夕霜朝有隕有二汎柏和丸俱可
以風也次之以列傳族聚類蕃列閭錯野生民嗜慾不一其性
居處宴會不一其習不礙風聞傳諸觀記次之以襍志鳳有苞
麟有紱點纈寒英絢諸霞采殘膏賸馥膾炙千秋一言信史永
賴斯文而收之以藝文原竊謂信則傳疑則闕志意也詳而不
紊瞻而不穢此原之所以志意也是役也崇禎丙子三月旣望
入恩平越十日而受斯命適令公以公行入郡一月而志草成
又十日謝主人行原性懶不能遍謁諸名公訪採輿論時惟梁
叔建一人相與周旋管窺如此潤飾取裁是在令公也是在令

公也嘗崇禎丙子長至之吉羊城盧原撰

宋志梁序

夫志所以紀風俗載典故別善惡以昭往鑒來厥係豈渺小哉
恩平縣自成化戊戌迄今百有餘禩而志未就豈非缺典萬歷
戊戌秋督府陳爲通志之纂檄各府州縣緝其舊志以聞而恩
乏刻本無以應也翁源何師署學事承督府之命惟謹謬察棟
於儔伍中而付茲役棟固辭而固弗免爰取前輩所紀傳者縱
觀之則慨三難焉夫孔子作春秋其事桓文其文史義則自謂
竊取之事非文不傳文非義不斷義以命文文以叙事是謂三
長今前無文之可乘而蕪穢謏劣即片語亦當新撰則創構之

難萬歷弓田後册籍攤移畝例絲棼役亦絲之而兵戎更置廩
餉靡常則推算之難名宦人物原無衡論而欲一一訪其生平
立之列傳以垂勸懲則考覈之難以此三難加之不敏其何以
稱督府至意以無負翁源知人之明也余爲此跼踖屢橐筆焉
已熟思之與其畏難而止使一邑鉅典終屬淪沒無寧畢才而
赴據實而紀以備觀風者一擇亦足爲理道資者於是殫精博
採矢志裁訂抵歲暮而稿始成爲例十有二始之以地理而疆
域列矣表之建置正之祀典紀之賦役嚴之兵防以秩官者昭
其序以選舉者登其名以名宦者錄其績以人物者覈其實以
貞烈者彰其節以文藝者採其工至事變祥異道之囿也咸亦

論次付雜志焉經世居子棄其詞而採其實商榷推行以期實用則督府命修至意其不虛哉而棟亦藉是以報翁源以寡過免咎矣若謂意長才短無所取裁持三說以誚我何以解焉邑人梁維棟撰

修志原序

今上統御區宇北控烏龍江南抵臺灣幅員二萬里自古帝王撫有甸服未有如此之廣也頃者萬幾之暇留心版圖下戶禮二部臣諭天下直省令郡縣上所治山川城堡戶口之志於布政司檄所在文儒藝士纂修通志寫繪輿圖以進未期年告成百代建置兆民生聚如示諸掌又書契以來天府圖書所未

備也世男恭際盛典以二十二年春承乏知恩平縣事恩平故宋恩州隸肇慶府之南古遷謫諸君子之區其地當三歧衝塗介山海雜糅獠獍無所爲政明成化二年置堡以處其民至十五年從兩廣總督朱公奏請割新會新興陽江三縣附比之里以立縣其時承平令此者沿故事以守其官未有聞也崇禎九年宋公應昇來知縣始作縣志經分緯列頗得圖志之體於是恩平乃得附見於郡邑迨國朝兩粵用兵幾三十年恩平尤伏莽出沒之藪巖邑邱墟廟宮禾黍人民生產幾不可問令無所棲類居村隅菱舍歲時禮會入城立綿葺於縣址率僚屬北向拜舞而去官師賦役卽列諸縣之後曾不得名一堡矣世男蒞官

既受事立草中左顧師儒右進父老而告之曰令受天子命宰縣則縣之土地人民令是責矣五十里百里皆天子之封疆令舍封疆居菱舍視縣爲郵傳如民人何時

先師主祀蓬樞下有年世男謁廟退益不自安乃發使奉書信歸營祖父積俸以次建置明年捐牛種勸墾居亡何草萊闢田野復盜賊息學宮巍然廨宇鱗次婦子襁負而歸者入其境望城闕涂井遲回莫知所以自世男至官迄今蓋五年云世男惟興作苟完文獻無徵非所以答天子式負版至意會求得宋公縣志於旁郡正訛補逸徵事考文仍志之目十有一而列其小序於下世男不敏大書國朝損益因革之制進邑之紳士鄭軾

何俊劉介玉許大任修飾潤色續於篇而於山川兵防三致意焉蓋恩平交錯山海萑苻之跡滋蔓偃伏今雖貉獠買犢吏民無擾世男不敢謂恩已治可以撫鳴琴樂絃歌而忽於天子加意地輿安不忘危之道也是爲序皆康熙二十七年戊辰仲夏文林郎知恩平縣事遼陽佟世男頓首撰

曾志原序

縣有志何昉乎周官外史掌邦國之記記之爲言志也藏於國則爲史上之朝則爲記明不敢與王史埒其實皆史也封建既廢易爲郡縣史之名乃專屬之柱下掌其紀載之散見於郡縣者皆謂之志論者謂史貴簡而明志貴詳而核雖體裁不無小

異其爲記載之書一而已恩平設縣在明成化間至崇禎乙亥
宋君應昇始爲志當是時明運式微盜賊蠡起恩平固戎焉往
來之地也爲之令者方補苴罅漏之不遑何暇觚論著述而宋
君毅然能爲之國朝康熙二十五年伏莽初平元氣方復佟君
爲宰復毅然增修之是二君者皆有功於恩者也嗣後遂無復
修者前令何繆二君皆史才也慨然思修之卒亦不果蓋縣志
之成若是其難焉余於乾隆庚辰六月蒞恩平去佟君之時且
七十餘年問志於掾吏則曰版蝕於蠹投諸火索紳士家得剩
本亦殘缺不可讀余乃憮然歎曰風化氣運之轉移科條政令
之施設閱時而遷焉所藉以考信者惟此載籍之僅存耳而任

其消沉磨滅焉如文獻何顧入官伊始簿書期會日不暇給固
有志而未逮也既而攝篆潮陽至乙酉冬暮還恩平會 巡憲
陶公詢及之慙然益無以自安乃於丙戌三月延寓賢選邦彥
扁局授簡至六月而書竣凡十卷首疆域別封圻也次建置明
因革也次記事備考核也次秩官昭職宇也覈芻牧則賦役有
志重陶淑則禮樂有志嚴斥埃則兵防有志樹典型則人物有
志畜牧饒土地之利則物產有志詞章發邦國之華則藝文有
志他如星野之躔度機祥之徵驗山川之流峙陂塘之蓄洩風
俗之淳澆學校關乎風教祭祀肅於彝章以及名宦鄉賢貞娥
淑媛繫人心之懲勸橋梁墟市津渡亭臺關物理之盛衰凡一

事一物之微苟有關於志例莫不因類附見故爲目四十有九雖不敢謂考據精詳足以信今而傳後於是非好惡之公當不至大相刺謬於前人已是役也原其始要其終浮者汰之實者存之或當詳而詳或當畧而畧友人澹廬周君實斟酌而損益之余特發凡起例操取舍之微權間以臆見附之餘論焉耳若夫廣採訪慎校讐則邑紳士與有勞焉乾隆三十一年歲在柔兆閏茂桐月朔日閩中曾萼書於南平官署

曾志周序

繆以樛昧無能之資落拓不羈之行奔走燕粵間者幾二十年蓋甘自濩落久矣甲申秋重遊東粵會閩漳曾公攝治潮陽招

以俱往公固恩邑大夫也明年乙酉還恩平仍獲屬車之載夫亦謂斯二邦者皆足跡所未至青雲可托藉以一探山水之幽奇耳不虞公之以縣志誘也志猶史也春秋而后稱良史才者莫如遷固後世猶謂記繁而志寡史之失自遷固始况出遷固下者平近之爲志也大率皆假手大人先生次亦一時知名士其識精其學富其才敏其手筆自高古而邁俗勢位之崇隆聲望之赫奕又足以震攝衆人之耳目關其口而奪之氣故書出而人莫敢議其後不然未有不羣起而譁掩袖而笑者紳何人斯敢當斯任夫強補鍋者鑄千石之鐘彼知金之於何范土之於何合乎呼斲輪者構九仞之堂不血指汗顏者蓋亦寡矣辭

之再三而公終弗許也乃蒐羅散佚尋舊志於煨燼之餘刪其繁補其失正其誤闕其疑釐爲十卷始於丙戌三月至六月而草稿甫定念賦役爲民生所繫忠賢節孝實風化所關考核採訪務詳且確視他志尤加慎焉若夫次第分明體裁嚴整公先爲之發凡緝惟遵循軌轍期無越畔而已書成獻之公公於鳴琴之暇研精汰粗去俗存雅一筆一削皆有深意則又光弼代子儀軍旌旗一變矣至若荒村潛德幽巷貞婺以及先哲遺跡勝朝逸事或以傳聞無據挂漏貽譏則邑紳士任分採者限於聞見之未周緝與曾公不任咎也乾隆丙戌孟秋上浣乞巧前二日寶山周書澹廬甫書於南平邑署之金粟軒

石志原序

恩平縣在肇慶府治之南古南恩州地山海盤繞民獠雜處宋元以前沿革不一官於斯者非遷謫罕到明置恩平驛屬陽江縣景泰天順間西獠入寇高涼以東數百里無完城土人爭起從賊巢壘遠近相望成化初元偏師征討絲棼莫治臺院簡昇僉事陶公直搗巢穴渠魁聿殲散餘衆數萬人還各郡縣築恩平堡以防之在陽江水東都要險區南通陽江北通新興東連新會當三邑之交六郡之衝至十五年兩廣總督擲陽朱公英請將陽江新興新會附近里圖民人湊撥恩平堡立以爲縣凡割三縣人戶三千戶糧一萬石縣以驛名城因堡建新會陳白

沙先生儒學碑記紀其事特詳洎我朝定鼎兩粵之地用兵幾三十年恩平尤多伏莽迨後相承德教淪浹薄海內外咸登衽席恩平雖地處彈丸而沐浴大化涵濡既久民物滋豐至今遂爲樂土甲申夏六月予捧檄縮縣符問民疾苦興利剔弊惴惴慄慄玷前徽治理稍暇搜覽志乘竊見恩之文獻事蹟闕佚者幾六十年中夜覃思急應修補時上憲正飭各郡縣有修葺志書之舉前任楊公學顏奉檄編纂未果以事去予因不揣固陋爲之踵成其事並返學博楊君秀拔主講梁君卓成及諸生馮子師元等共相參考刪煩就簡凡十閱月書成以予忝爲邑宰復請弁言於首余按恩平自設縣歷一百六十七年前縣令

奉新宋公應昇始創立縣志又五十二年遼陽佟公世男初修之又七十七年福建和平曾公夢再修之爲序共若干篇文美意備其何能復贊一辭然馬貴與有言志者憲章之所繫非老於典故者不能爲誠以山川險夷時俗歧異經野所分風氣所趨區宇之廣戶口之數具存圖志作而不述後將無徵今此重修體叅其舊事增於前山陵水泉鄉亭道里土田人物吏治風俗禮樂文章賢否淑慝靡不綱舉目張既詳且備駑鈍如予固藉以物其土宜知其利害達其志而通其欲齊其政而修其教以仰副天子課吏安民之至意卽後之守此土牧此民者求前人因革損益之原委勞來還定安集之機宜治績善敗興替之

樞要亦舍是蔑由焉爰允所請而爲之叙並大書協修分纂探
訪督梓諸君子姓名於簡端以著成勞皆道光五年歲次乙酉
上浣署恩平縣事僊平石臺撰

續修恩平縣志職名

倡修

恩平縣長黃子聰

恩平縣長莊陶如

舉人任文昌縣教諭鄭潤霖

刑部貴州司郎中梁錫慶

拔貢舉人欽點法部主事充法部統計處纂修吳汝讓

拔貢中書科中書分省補用直隸州分州伍瑤光

舉人林其芳

薦任職任用法學士馮廷立

恩平縣志

卷首

職名

聖堂光華書局承印

主修

恩平縣長余丕承

總纂

補用道署浙江嚴州府知府翰林院檢討國史館總纂本衙門撰文 桂 站

分纂

優廩貢中書科中書特授番禺縣教諭吳楚翹

協修

拔貢就讀州判特授信宜縣教諭歷署仁化縣訓導南雄州學正兼理訓導 鄭堯棟

歲貢福建府經歷吳錦潢

增貢代理廣西興業縣知縣直州用分先補用知縣岑燮葵

增貢賞加五品梁鏡蓉

附貢馮汝璿

附貢唐煊芳

廩貢鄭邦基

附貢梁汝梅

廩貢賞加五品馮聰捷

附貢陳寶鑾

廣東公立法政專門學校法律本科優等畢業吳潤光

采訪

兩廣將弁學堂畢業聶子才

附貢伍保倫

附貢吳炳蔚

增貢吳鉅猷

附貢司徒鑒

附貢司徒策

梁若醴

鄭厚周

梁道泮

繪圖

梁盛

校對

梁懷英

恩平縣志

卷首

職名

三

聖堂光華書局承印